

**BOSNA I HERCEGOVINA**  
**MINISTARSTVO KOMUNIKACIJA I PROMETA**

Na osnovu člana 8. Zakona o ministarskim imenovanjima, imenovanjima Vijeća ministara i drugim imenovanjima Bosne i Hercegovine („Službeni glasnik BiH“, br. 7/03 i 37/03), a u vezi sa zaključkom Vijeća ministara Bosne i Hercegovine broj: 05-34-3-3256/20, sa 24. sjednice održane 28. 1. 2021. godine, Ministarstvo komunikacija i prometa Bosne i Hercegovine *objavljuje*

**JAVNI OGLAS ZA IZBOR I IMENOVANJE JEDNOG ČLANA**  
**VIJEĆA AGENCIJE ZA POŠTANSKI PROMET BOSNE I HERCEGOVINE**  
**IZ REDA BOŠNJAČKOG NARODA**

S obzirom da je istekao mandat jednog člana Vijeća Agencije za poštanski promet Bosne i Hercegovine iz reda bošnjačkog naroda, raspisuje se Javni oglas za izbor i imenovanje jednog člana Vijeća Agencije za poštanski promet Bosne i Hercegovine iz reda bošnjačkog naroda.

**1. Nadležnost Agencije za poštanski promet Bosne i Hercegovine**

Agencija za poštanski promet Bosne i Hercegovine (u daljnjem tekstu: Agencija) obavlja regulatorne djelatnosti u području poštanskog prometa i djeluje u interesu Bosne i Hercegovine i njenih građana.

Agencijom upravlja Vijeće Agencije, sastavljeno od tri člana.

Nadležnost Agencije definirana je članom 10. stav (5) Zakona o poštama Bosne i Hercegovine („Službeni glasnik BiH“, broj 33/05).

**2. Sastav i mandat Vijeća Agencije**

Članovi Vijeća Agencije biraju se iz reda tri konstitutivna naroda u Bosni i Hercegovini, na period od četiri godine, a predsjedavajući Vijeća Agencije mijenja se svakih godinu dana.

**3. Opis poslova člana Vijeća Agencije**

Organizira i koordinira radom Vijeća Agencije, predstavlja Agenciju i odgovoran je za pravilno i zakonito funkcioniranje Agencije.

**4. Imenovanje**

Članovi Vijeća Agencije imenuju se u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine („Službeni glasnik BiH“, br. 7/03 i 37/03).

**5. Uvjeti za kandidate**

**a) Opći uvjeti**

Kandidat za jednog člana Vijeća Agencije iz reda bošnjačkog naroda dužan je ispunjavati sljedeće opće uvjete:

- da je državljanin Bosne i Hercegovine,
- da je stariji od 18 godina,
- da je zdravstveno sposoban za obavljanje poslova za koje se kandidira (ljekarsko uvjerenje kandidat dostavlja po konačnom imenovanju),
- da nije otpušten iz državne službe u institucijama Bosne i Hercegovine, odnosno entiteta kao rezultat disciplinske mjere u periodu od tri godine prije dana objavljivanja upražnjene pozicije,
- da se na njega ne odnosi član IX 1. Ustava Bosne i Hercegovine,

- da protiv njega nije pokrenut krivični postupak za krivično djelo za koje je predviđena kazna zatvora tri ili više godina ili da im nije izrečena zatvorska kazna za krivično djelo učinjeno s umišljajem u skladu sa krivičnim zakonima u Bosni i Hercegovini,
- da nije na funkciji u političkoj stranci u smislu člana 5. Zakona o ministarskim imenovanjima, imenovanjima Vijeća ministara i drugim imenovanjima Bosne i Hercegovine.

#### **b) Posebni uvjeti**

Pored navedenih općih uvjeta, kandidat za jednog člana Vijeća Agencije iz reda bošnjačkog naroda dužan je ispunjavati i sljedeće posebne uvjete:

- visoka stručna sprema (VII stepen stručne spreme, odnosno visoko obrazovanje bolonjskog sistema studiranja vrednovano sa najmanje 240 ECTS bodova), završen ekonomski, pravni ili prometni fakultet,
- najmanje pet godina radnog iskustva u struci, od čega tri godine na rukovodećim poslovima,
- poznavanje engleskog ili francuskog jezika,
- poznavanje politike, zakonodavstva, tehnologije rada i međunarodnih odnosa u oblasti poštanskog prometa,
- posjedovanje sposobnosti rukovođenja ljudskim i materijalnim resursima,
- komunikacijske, liderske i organizacijske sposobnosti,
- prilagodljivost timskom radu.

### **6. Potrebni dokumenti**

#### **a) Ovjerena fotokopija ili original:**

- fakultetske diplome (nostrificirane diplome, ukoliko fakultet nije završen u Bosni i Hercegovini ili je diploma stečena u nekoj drugoj državi nakon 6. 4. 1992. godine; odnosno, za kandidate koji su visoko obrazovanje stekli po bolonjskom sistemu uz univerzitetsku diplomu i dodatak diplomi; izuzetno, samo u slučaju da visokoškolska ustanova dodatak diplomi nije uopće izdavala, niti za jednog diplomca, kandidat je dužan da uz ovjerenu kopiju univerzitetske diplome dostavi uvjerenje visokoškolske ustanove da dodatak diplomi nije uopće izdat, niti za jednog diplomca),
- uvjerenje o državljanstvu (ne starije od šest mjeseci od dana izdavanja od nadležnog organa),
- dokaz o traženom radnom iskustvu (potvrda ili uvjerenje o radnom iskustvu izdati od institucija/organizacija u kojima je kandidat stekao radno iskustvo),
- uvjerenje o nevođenju krivičnog postupka izdato od nadležnog suda (ne starije od tri mjeseca),
- dokaz o poznavanju engleskog ili francuskog jezika,
- izjava kandidata da nije otpušten iz državne službe u institucijama Bosne i Hercegovine, odnosno entiteta kao rezultat disciplinske mjere u periodu od tri godine prije dana objavljivanja upražnjene pozicije (ovjerena od nadležnog općinskog organa ne starija od tri mjeseca),
- izjava kandidata da se na njega ne odnosi član IX stav 1. Ustava Bosne i Hercegovine (ovjerena od nadležnog općinskog organa ne starija od tri mjeseca),
- izjava kandidata da nije na funkciji u političkoj stranci u smislu člana 5. Zakona o ministarskim imenovanjima, imenovanjima Vijeća ministara i drugim imenovanjima

Bosne i Hercegovine (ovjerena od nadležnog općinskog organa ne starija od tri mjeseca).

- b) Svojeručno potpisan i popunjen obrazac koji se može dobiti u prostorijama Ministarstva komunikacija i prometa Bosne i Hercegovine (Protokol na IV spratu Zgrade prijateljstva između Grčke i Bosne i Hercegovine, Trg Bosne i Hercegovine 3 ili na službenoj internetskoj stranici Ministarstva [www.mkt.gov.ba](http://www.mkt.gov.ba)). Napominje se da potpisan i popunjen obrazac ne može služiti kao dokaz bilo kakvog uvjeta iz teksta Javnog oglasa, on samo olakšava rad organu koji vrši izbor i imenovanje te predstavlja samo informacije o kandidatu, koje je potrebno dokazati traženom dokumentacijom.

#### **Napomena za kandidate:**

- Pod radnim iskustvom podrazumijeva se isključivo radno iskustvo nakon stečene visoke školske spreme, i to na poslovima za čije je obavljanje uvjet posjedovanje visoke školske spreme.
- Radno iskustvo na rukovodećem radnom mjestu dokazuje se isključivo potvrdom ili uvjerenjem izdatim od institucija/organizacija u kojima je kandidat stekao to iskustvo.
- Isprave koje mogu poslužiti kao dokaz poznavanja stranog jezika su: uvjerenje škola ili drugih institucija koje se bave učenjem stranih jezika, bez obzira da li se nalaze u Bosni i Hercegovini ili izvan nje; uvjerenje fakulteta (o provjeri znanja jezika, položenom ispitu stranog jezika tokom školovanja), kao i druga isprava fakulteta (ovjerena kopija upisnice/indeksa) koja potvrđuje poznavanje ili znanje jezika, odnosno položene ispite stranih jezika; diploma ili druga isprava koja potvrđuje stečeno zvanje ili zanimanje koje je neposredno vezano za znanje stranog jezika (npr. profesora jezika, jezičkog prevoditelja, asistenta prevoditelja i sl.); diploma završenog fakulteta ili stečenog naučnog zvanja u Bosni i Hercegovini ili u inostranstvu na osnovu koje se nedvosmisleno može utvrditi da je isto školovanje u cjelini ili u pretežnom dijelu završeno na stranom jeziku.
- **Nepravovremene, nepotpune i neuredne prijave, kao i fotokopije tražene dokumentacije koje nisu ovjerene neće se uzimati u razmatranje.**

#### **Obratiti pažnju na sljedeće dokumente koja ne treba dostavljati, jer isti ne mogu služiti kao valjan dokaz:**

- Uvjerenje o diplomiranju starije od godinu dana. Univerzitetske diplome akademskog zvanja magistra ili ekvivalenta, akademskog zvanja doktora ili ekvivalenta ili dr. slične diplome. Iste ne mogu dokazati stečeno zvanje završenog dodiplomskog (osnovnog) studija. Ne dostavljati univerzitetsku diplomu bez dodatka diplomu ukoliko je visoko obrazovanje stečeno po bolonjskom sistemu studiranja.
- U pogledu dokazivanja državljanstva i starosne dobi ne treba dostavljati kopiju lične karte, obavještenje da je uveden u evidenciju prebivališta – boravišta sa ličnim podacima (obrazac prijava/odjava), nevažeće uvjerenje o državljanstvu, odnosno, uvjerenje starije od šest mjeseci od dana izdavanja od nadležnog organa, pri čemu se navedeni rok računa od dana izdavanja uvjerenja od nadležnog organa do dana predaje prijave na Javni oglas.
- U pogledu radnog iskustva ne dostavljati: radnu knjižicu jer ona ne može dokazati nijedan oblik radnog iskustva, može dokazati samo radni staž. Potvrde/uvjerenja kojima se dokazuje radni staž također neće biti uzete u razmatranje, jer radni staž predstavlja samo vrijeme koje zaposlenik provede u radnom odnosu, isti ne može dokazati o kojoj vrsti radnog iskustva je riječ; ugovor o radu, ugovor o obavljanju privremenih i povremenih poslova, ugovor o djelu i dr. ugovore; rješenje ili odluku o

zasnivanju/prestanku radnog odnosa - isti dokazuju samo početak/prestanak radnog angažmana i naziv radnog mjesta, ne i njegov kontinuitet; sporazum, preporuke ili druge slične isprave ukoliko ne sadrže sve elemente potvrde/uvjerenja, uvjerenja izdata od nadležnog zavoda/fonda PIO/MIO o podacima registriranim u matičnoj evidenciji bez potvrde nadležnog zavoda/fonda PIO/MIO gdje je navedena šifra zanimanja. Također, ne dostavljati dokumente koji ne sadrže elemente potvrde ili uvjerenja, odnosno dokumente u kojima nije decidirano navedeno sljedeće: osnovne generalije, vrsta školske sprema u okviru radnog mjesta, tj. stručna sprema predviđena za konkretno radno mjesto, naziv radnog mjesta, preciziran period radnog angažiranja, te ostali relevantni podaci za dokazivanje tražene vrste radnog iskustva.

- U pogledu dokazivanja nivoa znanja stranog jezika ne dostavljati potvrdu ili uvjerenje poslodavca gdje je lice bilo u radnom odnosu, kojom poslodavac potvrđuje znanje stranog jezika jer isti nije registriran za obavljanje te djelatnosti te takvi dokazi nisu valjani. Ne dostavljati svjedočanstva o završenim razredima srednje škole.
- Nepotpisan, nepopunjen, ispravljen ili izmijenjen prijavni obrazac.

Komisija za izbor poziva sve kandidate koji su ušli u uži izbor na intervju. Kandidat neće biti stavljen na listu užeg izbora ukoliko nije uspješno ocijenjen prema kriterijima za imenovanje. Prilikom pozivanja kandidata na intervju, svaki kandidat koji je ušao u uži izbor dobit će obrazac u kojem će iznijeti bilo koje pitanje koje bi moglo dovesti do sukoba interesa u slučaju da dođe do njegovog imenovanja.

Kandidati koje nakon intervjua preporučí Komisija za izbor smatrat će se da su uspješno prošli otvorenu konkurenciju.

Zainteresirana stranka može podnijeti prigovor na konačno imenovanje ako vjeruje da u procesu imenovanja nisu ispoštovani principi utvrđeni Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine. Prigovor se podnosi Vijeću ministara Bosne i Hercegovine a kopija se dostavlja Ombudsmenu za ljudska prava Bosne i Hercegovine.

## **7. Rok za podnošenje prijave**

Javni oglas objavljuje se u „Službenom glasniku BiH“, „Službenom glasniku Brčko distrikta BiH“ i u dnevnim novinama „Dnevni avaz“, „Glas Srpske“ i „Večernji list“.

Prijave na Javni oglas sa traženim dokumentima podnose se u roku od 21 dana od dana objavljivanja oglasa u „Službenom glasniku BiH“, putem pošte preporučeno na adresu:

**MINISTARSTVO KOMUNIKACIJA I PROMETA BOSNE I HERCEGOVINE**  
**„Javni oglas za izbor i imenovanje jednog člana Vijeća Agencije za poštanski promet Bosne i Hercegovine iz reda bošnjačkog naroda“**  
**Trg Bosne i Hercegovine 3**  
**71 000 Sarajevo**

**MINISTAR**

**Dr. Vojin Mitrović**